

摘藻堂四庫全書薈要

集部

欽定四庫全書薈要卷一萬四千九百九十九

集部

樂城集卷四

宋 蘇轍 撰

詩七十四首

次韻子瞻廣陵會三同舍各以其字為韻

劉貢甫

貢甫少多才交遊一何衆談詞坐傾倒玉塵日揮弄  
逡巡不為虐巧捷有微中羣情忌超邁微過出嘲諷南遷  
時已久未見肯力貢舌在終自奇髀滿安足痛人生百

年內僅比一朝夢駸駸就消涸斗水傾漏甕江淮未可  
嫌遲晚聊自送試觀終日閒何似兩耳閑

孫巨源

巨源學從橫世事夙討論著書十萬字辯如白波翻諫  
垣適多事憂心生病根立談信無補閉口出國門棄置

卧江海閑嘿寧復言朝行共長歎逐客繼二孫

謂莘老  
巨源

南方固鄉黨謫官侶鶴猿風俗未寧靜朋黨爭排跟引  
去良自得濁清在澄源往者未可招冠蓋方駿奔

劉莘老

莘老奮徒步首與觀國賓儼然自約束被服鞞與紳屨  
勉丞相府接迹輿臺臣顧嫌仕安躁未忍裂坐茵推置  
冠獬豸謂言我比隣三晉固多士翫骸存斯人竄責不  
敢辭狂言見天真南方異風俗強食魚尾莘應同賈太  
傅挹屈耻自陳猶有痛哭書受釐定何辰

和子瞻金山

長江欲盡濶無邊金山當中唯一石湖平風靜日浮海

縹緲樓臺轉金碧瓜洲初見石頭城城下波濤與海平  
中流轉柂疑無岸泊舟未定僧先迎山中岑寂恐未足  
復將江水遶山麓四無鄰家羣動息鐘聲鏗鏘谷山谷  
烏鵲力薄墮中路惟有胡鷹石上宿誰知江海多行舟  
遊人上下奪巖幽老僧心定身不定送往迎來何時竟  
朝遊未厭夜未歸愛山如此如公稀不待遊人盡歸去  
恐公未識山中趣

和子瞻焦山

金山遊遍入焦山舟輕帆急須臾間涉江已遠風浪濶  
遊人到此皆爭還山頭冉冉萬竿竹樓閣不見門長闌  
金山共此一江水只有勝絕無此閑野僧終日飽一飯  
與世相視如髦蠻門無舟楫斷還往說法教化龜鼃頑  
偶然客至話鄉國西望落日低銅鑲岷峨正在日入處  
想象積雪堆青鬟稻田一頃良自給仕宦不返知誰扳  
久安祿廩農事廢強弓一弛無由彎行逢佳處輒歎息  
想見茅屋藏榛菅我知此地便堪隱稻苗旆旆魚斑斑

焦山長老  
蜀僧也

次韻子瞻遊甘露寺

去國日已遠涉江歲將闌東南富山水跬步留清歡遷  
延廢行邁忽忘身在官清晨涉甘露乘高棄征鞍超然  
脫闌闔穿雲撫朱欄下視萬物微惟覺滄海寬潮來聲  
洶洶望極空漫漫一一渡海舶冉冉移檣竿水恠時出  
沒羣嬉類蝦鰌幽陰自生火青熒復誰鑽石頭古天險  
憑恃分權瞞疑城曜遠目來騎驚新觀聚散定王業成

毀猶月團金山百圍石岌岌隨濤瀾猶疑漢宮廷屹立  
承露盤狂波恣吞噬萬古嗟獨完凝眸厭滉漾遶屋行  
盤跚此寺歷今古遺迹皆龍鸞孔明所坐石牀纏非人  
刊經霜衆草短積雨青苔寒蕭翁嗜佛法大福將力干  
坡陀故鏤在甲錯蒼龍蟠衛公秉節制佛骨埋金棺長  
松看百尺畫像留三歎新詩語何麗傳讀紙遂刊嗟我  
本漁釣江湖心所安方為籠中閑仰羨天際搏遊觀惜  
不與賦詠嗟獨難俸祿藉升斗齏鹽嗜鹹酸何時扁舟



去不竢官長彈

李簡夫挽詞二首

老成渾欲盡吊客一潸然遺事人人記清詩句句傳掛  
冠疏傳早樂世白公賢歎息風流在埋文得細鐫

其二

歸隱淮陽市遨遊十六年養生能淡泊愛客故留連傾  
蓋知心晚論詩卧病前葆光塵滿榻無復聽談禪

次韻子瞻初到杭州見寄二絕

吏治區區豈不任吳中已自富才能還應占位書名姓  
學取藍田崔縣丞

試盡風波萬里身到官山水却宜人君知晏子恩仍厚  
還與從來舊卜鄰

和柳子玉地爐

鑿地泥床不費功山深炭賤火長紅擁衾熟睡朝衙後  
抱膝微吟暮雪中寵辱兩忘輕世味冰霜不到傲天工  
遙知麻步無人客寒夜清樽誰與同

和柳子玉紙帳

夫子清貧不耐冬書齋還費紙重重  
窓明曉日從教入帳厚霜飈定不容  
京兆牛衣聊可藉公孫布被旋須縫  
吳綾蜀錦非嫌汝簡淡為生要易供

次韻子瞻遊孤山訪惠勤惠思

鳥依山魚依湖但有所有無所無  
輕舟沿泝窮遠近肩輿上下更傳呼  
翩然獨往不携孥兼擅魚鳥兩所娛  
困依巖石坐巉絕行牽翠蔓隨纏紆  
道逢勤思訪其廬誦

詩清切秋蟬孤隱居羞蹈陌上土何人起愛輪下蒲水  
南巷中羅百夫雞鳴朝謁至日晡人生變化安可料憐  
汝久遁終無圖鳬鷺不足鶴有餘一俯一仰戚與遽嗟  
我久欲從逃逋方圓不敢左右摹

宛丘二詠

并叙

宛丘城西柳湖累歲無水開元寺殿下山茶一株枝  
葉甚茂亦數年不開轍頃從子瞻遊此每以二物為  
恨去秋雨雪相仍湖中春水忽生數尺至二月中山

茶復開千餘朶因作二詩奉寄

旱湖堤上柳空多倚岸輕舟柰汝何  
秋雨連渠添積潤春風吹凍忽生波  
蟲魚便爾來無數鳬鴈猶疑未肯過  
持詫錢塘應笑我坳中浮芥兩么麼

古殿山花叢百圍故園曾見色依依  
凌寒強比松筠秀吐艷空驚歲月非  
冰雪紛紜真性在根株老大衆園希  
山中草木誰攜種潦倒塵埃不復歸

贈提刑賈司門青

前年乘舟護南河宛丘官舍酣且歌去年持節憂犴獄  
驅車道路日不足今年春風塵土黃遠赴三州議繇役  
天子憂民法令新整齊百事無間人苗耘髮櫛何時已  
回首昔遊如夢寐區區學舍曾未知春晚日長唯有睡  
才智有餘安得閒疎慵顧我自當然喜君未忘太平事  
獨稱赦書旌孝子

項城有孝子負土成墳賈移  
文陳州請用赦書存卹之

同陳述古舍人觀芍藥

藹藹堂西十畝園晚涼迎步綠陰繁共驚春去已多日

爭看花開最後番  
未許狂風催爛漫  
故將青幄強安存  
請公作意勸歡賞  
趁取殘紅照酒樽

次韻子瞻見寄

我將西歸老故丘  
長江欲濟無行舟  
宦遊已如馬受輓  
衰病擬學龜藏頭  
三年學舍百不與  
糜費廩粟常慚羞  
矯時自信力不足  
從政敢謂學已優  
閉門却掃誰與語  
晝夢時作釣天遊  
自從四方多法律  
深山更深逃無術  
衆人奔走我獨閒  
何異端居割蜂蜜  
懷安已久心自知  
彈

劾未至理先屈餘杭軍府百事勞經年未見持干旄賈  
生作傳無封事屈平憂世多離騷煩刑弊法非公恥怒  
馬奔車忌鞭箠藐藐何自聽諄諄諤諤未必賢唯唯求  
田問舍古所非荒畦弊宅今餘幾出從王事當有程去  
須膳肉嫌無名掃除百憂唯有酒未退聊取身心輕

趙少師自南都訪歐陽少師於潁州留西湖久之  
作詩獻歐陽公

公居潁水上德與潁水清身閒道轉勝內足無復營平



昔富交遊開門坐常盈退居萬事樂獨恨無友生汝潁  
亦多士後來非老成趙公平生舊情好均弟兄少年結  
意氣晚歲齊功名攜手踐廊廟躡足辭釣衡徜徉里閭  
間脫略世俗縈興來忽命駕一往千里輕白髮儼相映  
元勲各崢嶸人生會面難此會有餘情遨遊西湖中仲  
夏草木榮壺觴列四坐歌舞羅前楹畫舫極汭沂肩輿  
並逢迎掉進鳬鴨亂樂作蟲魚驚近寺駢履迹高臺吹  
笑聲往事語京洛餘歡發吟賡拳拳主人厚款款來客

誠此樂有時盡此好何由傾

次韻子瞻望湖樓上五絕

欲看西湖兩岸山卧乘湖上木蘭船湖山已自隨船改  
更值陰晴欲雨天

眼看西湖不暫來簿書無算撥還開三年屈指渾將盡  
記取從今得幾回

湖山欲買恨無錢且盡芳樽對玉盤菱角雞頭應已厭  
蟹螯馬頰更勤飧

終日清漪弄短橈久忘車乘走翹翹秋風且食鱸魚美  
洛下諸生未可招

滯留朝市常嫌鬧放棄江湖也未閒孤舫粗窮千頃浪  
肩輿未盡百重山

和柳子玉共城新開御河過所居牆下

卜築共山功欲成新河入縣巧相縈誰將畚鍤千夫力  
添上園林一倍清生長魚蝦供晚饌浮沉鵝鴨放春聲  
為隣有意非今日丐我餘波伴濯纓

歐陽太師挽詞三首

雄文元命世直氣早成風受任衰遲後安邦反側中迴  
天深有力扈聖恥言功事已身隨去驚嗟柱石空

其二

唐樊文初喪書成法至今雍容趨聖處深切可人心氣力知難繼風流喜不淫懸知公欲謝異說勇交侵

其三

推轂誠多士登龍盛一時西門行有慟東閣見無期念

昔先君子嘗蒙國士知舊恩終未報感歎不勝悲

賦黃鶴樓贈李公擇

公擇時知鄂州

前年見君河之浦東風吹河沙如霧北潭楊柳強知春  
樽酒相携終日語君家東南風氣清謫官河壩不稱情  
一麾夏口亦何有高樓黃鶴慰平生荆江洞庭春浪起  
漢沔初來入江水岸頭南北不相知惟見風濤湧天地  
巫峽瀟湘萬里船中流鼓楫四茫然高城枕山望如帶  
華棖照日光流淵樓上騷人多古意坐忘朝市無窮事

誰道武昌岸下魚不如建業城邊水

次韻子瞻餘杭法喜寺綠野亭懷吳興太守孫莘  
老

信美非吾土三吳一水中亭高望已極舟入去無窮朝  
市知安在湖山信有功遨遊逐鳬鴨飲食數魚蟲波浪  
喧朝夕梅烝變綠紅逢人問京洛去國長兒童同舍情  
相接鄰邦信屢通相邀欲相過道里訊溪翁

和子瞻宿臨安淨土寺

四方清淨居多被僧所占既無世俗營百事得豐贍家  
居每紛薄奉養出寒欠昔年旅東都局促吁已厭城西  
近精廬長老時一覘每來獲所求食飽山茶釀塵埃就  
湯沐垢膩脫巾幘不知禪味深但取饑腸饜京城苦煩  
溷物景費治染吳都沉清華觀刹吐光豔石矸度空濶  
泉溜瀉深塹經過未足多終老應長歎

和子瞻自淨土步至功臣寺

山平村塢連野寺鐘相答晚陰生林莽落日猶在塔行

招兩社僧共步青山月送客渡石橋迎客出林樾幽尋  
本真性往事聽徐說錢王方壯年此邦事輕俠鄉人鄙  
貧賤異類識英傑立石象興王遺迹今岌岌功勲三吳  
定富貴四海甲歸來父老藏崇高畏摧壓詩人巧譏病  
牛領恣挑挾流傳後世人談笑資口舌是非亦已矣興  
廢何倉卒持歸問禪翁笑拍浮漚沒

次韻子瞻遊徑山

去年渡江愛吳山忽忘蜀道輕秦川錢塘後到山最勝



下枕湖水相縈旋坐疑吳會無復有扁舟屢出凌濤淵  
今秋復入徑山寺勢壓衆嶺皆摧顛連峰沓嶂不知數  
重重相抱如青蓮散為雲霧翳星斗聚作潭井藏蜿蜒  
欽翁未到人迹絕千里受記來安禪荒榛野草置茅屋  
坐令海賈輸金錢至今傳法破煩惱飽食過客容安眠  
解裝投錫不復去紛紛四合來烏鳶或言此處猶未好  
海上人少無煩煎天台鴈蕩最深秀水驚石瘦尤清便  
青山獨往無不可論說好醜徒紛然終當直去無遠近

藤鞋竹杖聊窮年

次韻子瞻自徑山回宿湖上

朝從徑山來，泱泱徑山色。莫從湖上歸，滉漾湖光碧。借問泛湖舟，何似登山屐。高懷厭朝市，遠去忘憂慄。目向幽人青，顏從濁醪赤。塵埃解羅網，宇宙為安宅。油然了無營，此意誰能詰。嗟子別離久，欲往徒反側。留滯亦何為，空驚突深黑。

次韻子瞻題孫莘老墨妙亭

高岸為谷谷為陵一時豪傑空飛騰身隨造化不復返  
忽若野雀逢蒼鷹當年碑刻最深固風吹土蝕消無稜  
遺文漫滅雨中迹翠石斷裂春後冰古墳欲毀野廟廢  
行人不去征鞍憑書生耽翫立風雪飢驢厭苦疲奴憎  
愛之欲取恨無力旋揉翠墨濡黃繒不如好事孫太守  
牛車徙置華堂登遶牆羅列耀珪璧罷燕起讀留賓朋  
却思遺迹本安在原隰處處荒榛藤田夫野老誰復顧  
鬼火夜照來寒燈廢興聚散一如此反使涕泗沾人膺

熙寧壬子八月於洛陽妙覺寺考試舉人及還道  
出嵩少之間至許昌共得大小詩二十六首

洛陽試院樓上新晴五絕

縹緲危巖面面山朝來雲作雨潺潺忽然風卷歸何處  
百里陰晴反掌間

嵩少猶藏薄霧中前山迤邐夕陽紅高樓一閉三十日  
遙憶巖頭種藥翁

伊闕遙臨鳳闕前龍門女兒氣蒼然唐朝御路依稀在

猶想東廵塵暗天

天壇王屋北侵河高比嵩丘一倍多小有清靈今尚在  
俗緣深重柰成魔

前朝宮闕倚芒山殿閣層層半嶺間猶恐北來岡阜淺  
太行東抱故孱顏

和頓主簿起見贈二首

聲病消磨只古文諸儒經術闕紛紜不知舊學都無用  
猶把新書強欲分老病心情愁見敵少年詞氣動干雲

搜賢報國吾何敢欲補空疎但有勤

一鎖樓中暗度秋微官黽勉未能休笑談容我聊紓放  
文字憑君便去留杯酒淋漓已非敵清詩窈眇更難酬  
東歸猶得聯征騎同上嵩高望九州

將出洛城過廣愛寺見三學演師引觀楊惠之塑  
寶山朱瑤畫文殊普賢為賦三首

寺古依喬木僧閑正莫年為生何寂寞愛客尚留連虛  
牖羅脩竹空厨響細泉坐聽談舊事遍識洛中賢

其二

虛室無尋丈青山有百層迴峰看不足危石恐將崩聽  
法來天女依巖老梵僧須彌傳納芥觀此信還曾

其三

壁毀丹青在移來殿廡深賦形驚變態觀佛覺無心旌  
旆翻空色笙竽含妙音風流出吳樣遺法到如今

登封道中三絕

緱山祠

飛仙不返周王子重阜相連少室孫夜靜笙聲兼鶴下  
迴省惟有故山存

輟轅道

青山欲上疑無路澗道相縈九十盤東望嵩高分草木  
回瞻原隰湧波瀾

少林寺贈頓起

一徑喬林下黃葉三山翠壁遶禪居共君將住還歸去  
欲問安心知己疎

少林東接少室北倚石城南臨鳳凰山鳳凰山上有初祖庵二祖問法於此



登嵩山十首

石徑

蒼壁上參天微徑隨流水  
聲牙石齒亂紛薄黃葉委  
牽攀不得上顛仆幾將止  
勉強終此行更老知難至

玉女窓

巖竇有虛明矐矐發晴曉  
真人無儔匹窓下晨粧早  
門開秋雨入室靜長風掃  
絕跡杳難尋朱顏未嘗老

擣衣石

玉女雲為衣飄搖不須擣空傳巖下石夜杵知誰抱清  
泉供澣濯素月鋪繒綺人世迫秋寒處處砧聲早

醒心泉

上山苦饑渴中道得寒泉舉瓢石竇響入口煩痾痊狀  
流去不見落澗聲鏘然莫歸復相值相從下平川

峰頂寺

重重山前峯上上終非頂行登衆嶺徹始得山門迴高  
風慘多寒落日側先暝却視向所經眇如在深井

登封壇

登封事已遙，大碑摧風雨。  
靈壇久銷禿，古木中梁柱。  
峰巒至此盡，蒼石無寸土。  
俯視萬仞高，悲辛但狂顧。

法華巖

飛橋走巖居，茅屋今已破。  
何年避世僧，此地常獨卧。  
秋風高鳥入，夜月寒猿過。  
自非心已灰，靜極生悲憤。

將軍柏

在天封觀觀  
即唐避暑宮

肅肅避暑宮，石殿秋日冷。  
凜然中庭柏，氣壓千夫整。  
風

聲答萬壑雲色通諸嶺材大難為工甘與蓬蒿屏

吳道子畫四真君

在精思觀

浮埃古壁上蕭然四真人矯如雲中鶴猶若畏四鄰坐  
令世俗士自慚汙濁身勿謂今所無蒿少多隱淪

吳道子畫

四真君在精思觀

啓母石

神夫化黃熊神母化白石嬰兒剖還父涕泣何暇卹爾  
來三千歲往事誰復識惟有少姨存相望居二室

過韓許州石淙莊

水中有石曰淙唐天后朝常燕羣臣於此石刻尚在

飛泉來無窮發自嵩嶺背奔馳兩山間偶與亂石會傾  
流勢摧毀泥土久崩潰堅姿未消釋巖薛儼相對居然  
受噴潑雷轉諸壑內初喧墮深谷稍放脫重隘跳沫濺  
霏微餘瀾洶澎湃宸遊昔事遠絕壁遺刻在人迹久寂  
寥物理係興廢相君厭紛華築室俯湍瀨濯纓離塵垢  
洗耳聽天籟將追赤松遊自置青雲外道人亦何者預  
此事歸計猶恐山未深更種萬株檜

過登封閻氏園

秋暑尚煩襟  
林泉淨客心  
菊殘知節過  
荷盡覺池深  
疎柳搖山色  
青苔遍竹陰  
猶嫌近官道  
輾輾聽車音

許州留別頓主簿

洛寺相從不出門  
遶城空復記名園  
程文堆案晨興早  
竹簟連床夜語喧  
歸路逢僧暫容與  
登山無力強扳援  
遙知別後都如夢  
賴有君詩一一存

次韻子瞻登望海樓五絕

山色潮聲四面來城中金碧爛成堆不愁門外嚴扃鎖  
終日憑欄未擬迴

湖色蒼蒼日向斜煙波萬狀不容誇畫船人去浮紅葉  
石徑僧歸躡白蛇

樓觀爭高不計層噫噫過鴈自相磨錢王舊業依稀在  
歲久無人話廢興

荷葉初乾稻穗香驚雷急雨送微涼晚晴稍放秋山色  
洗却濃粧作淡粧

白酒傾漿膾斫紅晝遊未厭月明中樓高祇辨聽歌鼓  
不見遊人轉似蓬

和子瞻監試舉人

登科歲云徂舊學日將落外遭饑寒侵內苦憂患鑠傳  
家足墳史遺說本精約群言久紛蕩開卷每驚矍居官  
忝庠序授業止干籥朝廷發新令長短棄前獲緣飾小  
學家睥睨前王作聲形一分解道義因附託安行厭衢  
路強挽就縻縛縱橫施口鼻爛熳塗丹堊強辯忽橫流



漂蕩終安泊憶惟法初傳欲講面光忤新科勸多士從  
者盡高爵徘徊始未信銜誘終難却嗟哉守愚鈍幾不  
被譏謔獨醒慙鋪糟未信耻輕諾敢言折鋒銳但自保  
城郭有司顧未知選試謬西洛羣儒誰號令新語競投  
削雖云心所安恐異時量度詭遇便巧射晚嫁由拙妁  
誰能力春耕忍饑待秋穫聞兄職在監考較筆仍攔縮  
手看傍人此意殊未惡

和子瞻煎茶

年來病懶百不堪未廢飲食求芳甘煎茶舊法出西蜀  
水聲火候猶能諳相傳煎茶祇煎水茶性仍存偏有味  
君不見閩中茶品天下高傾身事茶不知勞又不見北  
方俚人茗飲無不有鹽酪椒薑誇滿口我今倦遊思故  
鄉不學南方與北方銅鑪得火蚯蚓叫匙腳旋轉秋螢  
光何時茅簷歸去炙背讀文字遣兒折取枯竹女煎湯  
次韻子瞻對月見憶并簡崔度

先師客陳未嘗飽弟子於今敢言巧敗牆破屋秋雨多

夜視陰精過畢昴  
蠶鹽冷落空盃盤  
且依道士修還丹  
丹田發火五臟暖  
未補漫漫長夜寒  
我生疲駑戀笙豆  
崔翁遊邊指北斗  
唯有王江亦未歸  
閑門無客邀沽酒  
宛邱道人王江好  
飲酒去冬遊沈丘  
遂不歸

和子瞻開湯村運鹽河雨中督後

興事常苦易成事  
常苦難不督雨中  
役安知民力殫  
年來上功勲智者  
爭雕鑕山河不自  
保疏鑿非一端  
譏訶西門豹仁智  
未得完方以勇自  
許未卹衆口歎天  
心閑劬

勞雨涕為汎濶不知泥滓中更益手足寒誰謂邑中黔  
鞭箠亦不寬王事未可回后土何由乾

次韻子瞻雨中督役夜宿水陸寺二首

雲氣連山雨瀉盆莫投僧舍欲關門暫時洒掃寬行役  
終夕崎嶇入夢魂煩熱暗消秋簟冷烝濡未解夜燈昏  
二年遊宦多勞苦何日相從得細論

野寺蕭條厭客喧雨披修竹亂紛然已因無食聊從仕  
深悟勞生不問禪未至莫憂明日事偷閒且就此宵眠

天明歸去芒鞋滑雖有藤輿懶上肩

次韻子瞻將之吳興贈孫莘老

宦遊莫向長城窟冬冰折膠弦亦絕吳中臘月百事便  
蟹煮黃金鱸膾雪京城舊友一分散近憶吳興須滿頰  
世事反復如翻飛今日共鯨前益垂畏人但恐去不遠  
適意未覺歸來遲借問校讐天祿閣何如江海同遊嬉

和子瞻畫魚歌

吳人以長釘加杖頭以杖畫水取魚謂之畫魚

潛魚在淵安可及垂餌投竿易如拾橫江設網雖不仁


一瞬未移收百十畫魚何者漫區區終日辛勤手拮据  
已嫌長網不能遍肯信一竿良有餘鯢鯢駭散蛟龍泣  
獲少驚多亦何益願從網罟登君庖碎首屠鱗非所惜

樂城集卷四

謹案卷三第六頁前一行雨結細實駢明珠刊本  
珠訛殊據別本改







總校官庶吉士臣張能照

校對官檢討臣龔大萬

謄錄監生臣賈捷三

欽定四庫全書薈要

集部

樂城集卷五

六

詳校官助教<sub>臣</sub>常循



欽定四庫全書薈要卷一萬五千

集部

樂城集卷五

宋

蘇轍

撰

詩六十六首

次韻子瞻吳中田婦歎

久雨得晴唯恐遲既晴求雨來何時今年舟楫委平地

去年簑笠為裳衣不知天公誰怨怒棄置下土塵與泥  
丈夫强健四方走婦女齷齪將安歸塌然四壁倚機杼  
收拾遺粒吹糠粃東鄰十日營一炊西鄰誰使救汝饑

海邊唯有鹽不早賣鹽連坐收嬰兒傳聞四方同此苦  
不關東海誅孝婦

次韻子瞻遊道場山何山

兩山相負為峯麓流水重重注溪谷遊人上尋流水源  
未覺崎嶇病雙足山深下視雲漫漫徑垂石底千屈盤  
松林陰森白日靜忽驚人世如奔湍客行不避苦寒出  
僧定端居不下席人生嗟與草木同置身所在由初植  
堂中白佛青髻鬟氣象冲淡非人間坐令遠客厭奔走

徑欲築室依空山木魚根根夜將旦星斗欹斜掛山半  
行後有程未可留將出山門復長歎

癸丑二月重到汝陰寄子瞻二首

憶赴錢塘九月秋同來潁尾一扁舟退居尚有三師在  
好事須為十日留傾瀉向人懷抱盡忠誠為國始終憂  
重來東閣皆塵土淚滴春風自不收

百頃西湖十里源近依城郭帶川原古臺駸駸先臨水  
野寺參差半掩門遠泛便成終日醉幽尋不盡數家園

錢塘未到能先說更著青山兩岸屯

次韻子瞻二月十日雪

春雪漫天密又稀勾芒失據走靈威故欺貧窶冬裘盡  
巧助遨遊酒盞飛林下細花添百草堦前輕素剪新機  
老農先解憂桑柘九月家人當授衣

和子瞻題風水洞

風送江湖滿洞天洞門可聽入無緣土囊鬱怒聲初散  
石齒聲牙勢未前樂奏洞庭真跌宕歌傳帝所亦清便

何人隱几觀遺韻重使顏成問嗒然

次韻子瞻新城道中

春深溪路少人行時聽田間耒耜聲  
饑就野農分餉黍  
迎嫌尉卒鬧金鉦  
閒花開盡香仍在  
白酒沽來壓未清  
此味暫時猶覺勝  
問兄何日便歸耕

次韻子瞻山村五絕

山行喜遇酒旗斜  
無限桃花續杏花  
與世浮沉真避世  
將家漂蕩似無家



塍間白水細無聲日暖泥融草不生似恐田家忘帝力  
多差使者出催耕

旋舂紅稻始經鎌新煮黃雞取次甜無慕無營人自樂  
莫將西子愧無鹽

升平事業苦匆匆未信浮名到底空何用索馳朝塞外  
試聽碌軸語場中

貧賤終身未要羞山林難處便堪愁近來南海波尤惡  
未許乘桴自在遊

次韻子瞻遊富陽普照寺

塵埃日已遠，斗數更無餘。  
寺到逢門入，詩成信手書。  
山深僧自樂，路遠客終疎。  
訪盡前朝景，他年一告予。

次韻子瞻自普照入山獨遊二庵

披榛入山，山路細。鐘聲出寺門，將閉石苔冉冉上芒鞋。  
草露溥溥，著衣袂。野人茅茨苦竹屋，終身局促無生計。  
天公未省長困人，春田米盡秋田繼。老妻稚子亦自樂，  
野草山花還挿髻。長笑人間醉未醒，終老辛勤漫欺世。

次韻子瞻與蘇世美同年夜飲

晚歲事遊宦相從未嘗足  
羨君四海皆兄弟棧中直木  
不容曲臨安老令況同科  
相逢豈厭樽中醪潦倒誰憐  
澗底松歲寒尚有霜前竹  
聞道渠家八丈夫他日歸耕  
免幽獨

次韻子瞻病中遊虎泉僧舍二首

掃地開門松檜香  
僧家長夏亦清涼  
公庭多事久來厭  
靜處安眠計甚長  
修竹填窓藤簾綠  
白蓮當戶石盆方

香厨晚飯紅粳熟忽憶烹雞田舍嘗

澗谷新晴草木香野情蕭散自生涼雨添山色翠將溜  
日轉松陰晚更長病客獨來唯有睡遊僧相見亦他方  
還家煩熱都消盡不信醫王與藥嘗

和子瞻東陽水樂亭歌

君不見武安前堂立曲旃官高利厚多憂患又不見夏  
侯好妓貧無力簾箔為衣人莫識兩人操行雖不同辛  
苦經營實如一不如君家激水石中流聽之有聲百無

憂笙竽窈眇度溪谷琴筑淒咽穿林丘高人處世心淡  
泊衆聲過耳皆為樂退食委蛇石上眠幽音斷續床前  
作正如古人樂易多歡娛積土為鼓塊為桴但能復作  
太古意君家水樂真有餘

次韻子瞻有美堂夜歸

飲闌鐘簾欲移軒香霧猶殘金博山明月飛來松嶺外  
遊人散落馬蹄間城嚴畫鼓初傳角路暗山花自落鬟  
清境暫時都不見夜深人盡始來還

次韻子瞻祈雨

世故紛紛誰復問蛟龍不雨獨安眠人間已厭三秋旱  
澗底猶慳一掬泉廟令酒肴時醉飽田家糠粃久安便  
憂心未已誰知卹更把爐香試一燃

次韻子瞻再遊徑山

我兄東南遊我亦夢中去徑山聞已熟往意穿雲霧夢  
經山前溪足冷忽先渡舉頭雲峰合到寺霜日暮香厨  
饌巖菽野徑踏藤屨平生共遊處蹇足躡高步崎嶇每

生胝眩晃屢回顧何年棄微官攜手衆山路

得此詩後  
夢與兄同

遊山中故  
為此篇

王仲儀尚書挽詞

謝公德業久彌新幼度英奇也絕倫父子俱賢真不朽  
功名自致豈相因邊兵屢動思良將廷論蕭條憶諍臣  
青史世家他日事新阡宿草倍沾巾

次韻范景仁侍郎移竹

雙檜生南戶叢筠種北牆交陰奉君子為伴老中堂露

洗秋堦綠風含夏簟涼栽花知己誤新上一番霜

寄題蒲傳正學士閨中藏書閣

朱欄碧瓦照山隈竹簡牙籤次第開讀破文章隨意得  
學成富貴逼身來詩書教子真田宅金玉傳家定糞灰  
更把遺編觀得失君家舊物豈須猜

自陳適齋戲題

庠齋三歲最無功羞愧宣王祿萬鍾猶欲談經誰復信  
相招執籥更須從陳風清淨眠真足齊俗彊梁懶不容



久爾安閒長自怪此行磨折信天工

送董揚休比部知真州

奏課西南最分符江海衝往來觀惠術蟠錯試餘鋒  
文字從堆案樽罍強解容金山只隔水時復聽晨鐘

送排保甲陳祐甫

我生本西南為學慕齊魯從事東諸侯結綬濟南府  
誰言到官舍旱氣裂后土饑饉費困倉剽奪驚桴鼓  
緬焉禮義邦憂作流亡聚君來正此時王事最勤苦  
驅馳黃

塵中勸說野田父，穰穰百萬家。一一連什伍，政令當及期。田間貴安堵，歸乘忽言西。劬勞共誰語。

送韓祗嚴戶曹得替省親成都

宦遊東土暫相依，政後頻頻會合稀。每恃詳明容老病，不堪羈旅送將歸。思親道路寧論遠，入蜀山河漸覺非。我有舊廬江水上，因君聊復夢魂飛。

和孔教授武仲濟南四詠

環波亭

南山迤邐入南塘北渚岩崑枕北牆過盡綠荷橋斷處  
忽逢朱檻水中央鳬鷺聚散湖光淨魚鼈浮沉瓦影涼  
清境不知三伏熱病身唯要一藤床

北渚亭

西湖已過百花汀未厭相携上古城雲放連山瞻嶽麓  
雪消平野看春耕臨風舉酒千鍾盡步月吹笳十里聲  
猶恨雨中人不到風雲飄蕩恐神驚

鵲山亭

築臺臨水巧安排萬象軒昂發瘞埋南山嶺崩騰來不盡  
北山斷續意尤佳平時戰伐皆荒草永日登臨慰病懷  
更欲留詩題素壁坐中誰與少陵偕

檻泉亭

連山帶郭走平川伏澗潛流發湧泉  
洶洶秋聲明月夜蓬蓬曉氣欲晴天  
誰家鷺鴨橫波去日暮牛羊飲道邊  
滓穢未能妨潔淨孤亭每到一依然

踏藕

春湖柳色黃宿藕凍猶彊翻沼龍蛇動撐船牙角長清  
泉浴泥滓粲齒碎冰霜莫使新梢盡炎風翠蓋涼

和李誠之待制燕別西湖并叙

熙寧六年九月天章閣待制李公自登州來守此邦  
愛其山川泉石之勝怡然有久留之意此邦之人安  
公之惠亦欲公之久於此也然自其始至而民知其  
方將復用懼其不能久矣明年二月詔書移牧河間  
邦之父兄皆惜其去雖公亦將留焉而不可得也於

是數與其僚燕於湖上曰北方幸安余將復老於此  
酒酣賦詩以別從而作者三人公平生喜為詩所至  
成編及來此邦而未嘗有所為故尤貴之遂相與刻  
於石以慰邦人之思焉

東來亦何恃夫子此分符談笑萬事畢樽罍衆客俱高  
情生遠岫清興發平湖坐使羈遊士能忘歲月徂縱歡  
真樂易恨別不須更廟幄新謀帥河間最近湖安邊本  
餘事清賞信良圖應念茲園好流泉海內無

送李誠之知瀛州

少年學詩書晚歲探至道豈伊封疆臣乃是廊廟寶苦  
恨富貴遲聲名得空早憶惟西羌桀始建元戎蠢思威  
炳朝日號令靡秋草功勲不容究孤高易摧倒歸來易  
三邦但養胸中顥寧知北邊將還須用耆老春風吹旌  
旆先聲遍城堡往事安足懲遺黎待公保

西湖二詠

觀捕魚

西湖不放長竿入羣魚空作淘河食漁人攘臂下前汀  
蕩漾清波浮兩腋藕梢菱蔓不容網箔作長圍徒手得  
逡巡小舟十斛重踊躍長魚一夫力柳條穿頰洗黃金  
鱠縷堆盤雪花積燒薤香橙巧相與白飯青蔬甘莫逆  
食罷相携堤上步將散重煎葉家白人生此事最便身  
金印垂腰定何益

食雞頭

芡葉初生縐如縠南風吹開輪脫轂紫苞青刺攢蝟毛



水面放花波底熟森然赤手初莫近誰料明珠藏滿腹  
剖開膏液尚糝糊大盍磨聲風雨速清泉活火曾未久  
滿堂坐客分升掬紛然咀噍惟恐遲勢若羣雛方脫粟  
東都每憶會靈沼南國陂塘種尤足東遊塵土未應嫌  
此物秋來日嘗食

次韻孫推官朴見寄二首

蒙愠未能憂悄悄得閒時復醉昏昏知君亦學無言語  
豈悟維摩不二門

病懶近來全廢學  
宦遊惟是苦思鄉  
粗知會計猶堪仕  
貪就功名有底忙  
懷舊暗聽秋鴈過  
夢歸偏愛曉更長  
故人知我今何念  
擬向東山賦首章

送張正彥法曹

憶見君兄弟相携謁侍郎  
通經誇早歲落筆盡成章  
試劇何輕銳當官便激昂  
三年知力竭大府覺才長  
知已未如格歸貧纔滿囊  
舊書還讀否師說近淒涼

君以三傳及第

今廢此科

送青州簽判俞退翁致仕還湖州

不作清時言事官海邦那復久盤桓  
早依蓮社塵緣少新就草堂歸計安  
富貴暫時朝露過江山故國水精寒  
宦遊從此知多事收取楞伽靜處看

和青州教授頓起九日見寄

歲月飄然風際煙紫萸黃菊又霜天  
莫思太室杉松外且醉青州歌舞前

昔年與頓君同登嵩頂時正重九

杯酒追歡真一夢

天涯回望正三年近來又欲東觀海  
聽說毛詩雅頌篇

君善  
講詩

題徐正權秀才城西溪亭

竹林分徑水通渠真與幽人作隱居溪上路窮惟畫舫  
城中客至有罾魚東來只為林泉好野外從教簿領疎  
不識徂徠石夫子兼因女壻覓遺書

徐生石介  
女壻也

和子瞻喜虎兒生

生男如狼猶恐厄寅年生虎慰爺孃汝家家世事文史  
門戶豈有空剛強試看猛虎在山谷斧牙鉤爪旗尾揚

徐行當道擇牛羊狐狸驚走熊豬忙我今老病思退藏  
生子安得尚激昂不見伯父擅文章逡巡議論前無當

次韻子瞻病中贈提刑段繹

京東分東西中劃齊魯半兄來本相從路絕一長嘆前  
朝使者還手把新詩玩憐我久別離卷帙為舒散誰言  
窮陋邦得此唱酬伴相逢傾蓋間晤語何旦旦宦遊少  
娛樂纏縛苦文案能於王事餘時作楚詞亂臂如近膏  
油未肯忘濯盥賢豪真勉強功業畏繚緩伊余獨何為

舊籍西南貫竊祿未遑歸自笑嗟已懦方當四海寒  
此一寸炭主勸客欲留逡巡要奪館柰何獨見收軟言  
強溫煖此意定難酬還予授子粲

次韻子瞻賦雪二首

麥苗出土正纖纖春早寒官令尚嚴雲覆南山初半嶺  
風乾東海盡成鹽來時瞬息平吞野積久欹危欲敗簷  
強付酒樽判醉熟更尋詩句鬪新尖

點綴偏工亂鵠鴉淹留欲解惱船車乘春已覺矜餘力

騁巧時能作細花  
殭鴈墮鳩誰得罪  
敗墻破壁若為家  
天公愛物遙憐汝  
應是門前守夜叉  
是歲京師雪尤甚  
鳩鵲凍死如積

次韻韓宗弼太祝送遊太山

羨君官局最優游  
笑我區區學問囚  
今日登臨成獨往  
終年勤苦粗相酬  
春深綠野初開繡  
雲解青山半脫裘  
回首紅塵讀書處  
煮茶留客小亭幽

次韻劉敏殿丞送春

春去堂堂不復追  
空餘草木弄晴暉  
交遊歸鴈行將盡

蹤跡鳴鳩懶不飛老大未須驚節物醉狂兼得避危機  
東風雖有經旬在芳意從今日日非

四月十一日立夏

次韻趙至節推首夏

首夏尋芳也未遲遶園紅紫尚菲菲無心與物真皆可  
有酒逢人勸莫違夢逐楊花無限思身慚啼鳥不如歸  
官居寂寞如僧舍海燕憐貧故入扉

次韻李昭叙供備燕別湖亭

池亭雨過一番涼雲髻羅裙客雨旁不覺行人離恨遠



貪看積水照筵光滿堂樽俎歡方劇極目江湖意自長  
歸去伊川瀟灑地不須遺念屬清湘

送李昭叙移黎陽都監歸洛省親

與君非舊識傾蓋便相親共事林泉郡忘歸南北人  
煮茶流水曲載酒後湖湄未覺遊從厭空驚別恨新  
瀕河今重地知己舊元臣洛下聞雞犬家書不浹旬  
西還倚門罷北渡羽書頻忠孝傳家事風流待一振

遊太山四首

初入南山

自我來濟南經年未嘗出不知西城外有路通石壁初  
行澗谷淺漸遠峰巒積翠屏互舒卷耕耨隨欹側雲木  
散山阿逆旅時百室茲人謂川路此意屬行客久遊自  
多念忽誤向所歷嘉陵萬壑底棧道百迴屈崖巘遞崢  
嶸征夫時出沒行李雖云艱幽邃亦已劇坐緣斗升米  
被此塵土厄何年道褒斜長嘯理輕策

四禪寺

山蹊容車箱深入遂有得古寺依巖根連峰轉相揖樵  
蘇草木盡佛事亦蕭瑟居僧麋鹿人對客但羞澁雙碑  
立風雨八分存法則云昔義靖師萬里窮西域華嚴具  
多紙歸來手親譯蛻骨儼未移至今存石室遺文盡法  
界廣大已萬億變化浩難名丹書畫京邑粲然共一理  
眩晃莫能識末法漸衰微徒使真人泣

靈巖寺

青山何重重行盡土囊底巖高日氣薄秀色如新洗入

門塵慮息盥漱得清泚高堂見真人不覺首自稽祖師  
古禪伯荆棘昔親啓人跡尚蕭條豺狼夜相觝白鶴導  
清泉甘芳勝醇醴聲鳴青龍口光照白石陞尚可滿畦  
塍豈惟濯蔬米居僧三百人飲食安四體一念但清涼  
四方盡兄弟何言庇華屋食苦當如薺

嶽下

東來亦何求聊欲觀海岱海西尚千里將行勇還退岱  
陰即齊疆南往曾歷塊春深草木長山暖冰雪潰中巷

無居人南畝釋耕耒車徒八方至塵至百里內牛馬汗

淋漓綺紈聲絳繅喧闐六師合洶湧衆流匯無復問誰  
何但自舍耽愛龍鸞畫車服貝玉飾冠佩驛騶蹴騰騫  
幡旆飛晻曖腥羶及魚鼈瑣細或蒲菜遊惰愧無齋技  
巧窮殊態縱觀睥未已精意殫一酌出門青山屯遶廊  
遺迹昧登封尚壇壝古觀寫旗隊戈矛認毫末舒卷分  
向背雍容太平業磊落豐碑在往事半蓬蒿遺氓但悲  
慨回瞻最高峰遠謝徂徠對欲將有限力一放目所迨

天門四十里預恐雙足廢三宿遂徘徊歸來欲誰對前  
年道輾轅直上嵩嶺背中休強飲食莫宿時盥頰稍知  
天宇寬不覺人寰穢歲時未云久筋骸老難再山林無  
不容疲薊坐自礙自知俗緣深畢老守闌闔何當御清  
風不用車馬載

送王璋長官赴真定孫和甫辟書

昔年旅南服始識王荊州威動千里肅恩寬行客留從  
容見少子風采傾凡儔溫然吐詞氣已覺清且修不見

十五年相逢話百憂青衫走塵土白髮各滿頭  
新棄東海邑願從北諸侯北鄙事多夥饑饉連  
戈矛盟好未可輕念當事懷柔主將今老成勉  
盡良計籌

寄孫朴

憶昔補官太皞墟泮宮蕭條人事疎日高鼾睡  
聲噓噓往還廢絕門無車君為戶曹畏簡書放  
懷疎懶亦似余相逢語笑夜躊躇烹煮梨栗羞  
殺蔬官居一去真蘧廬東來失計悔厥初夜聞  
桴鼓驚閭閻事如牛毛費耘鋤

違失真性從吏胥目視紛臂邀徐徐羨君不出心自如  
北潭秋水多芙蓉青荷包飯蒲為菹修然獨往深淵魚  
人生如此樂有餘胡為自投檻中狙

和韓宗弼暴雨

次韻

執熱卧北窓淋漓汗流注蛟龍遁水府誰起叩天戶偶  
然終日風振擾北山霧崩騰轉相軋變化不容睹雷聲  
運車轂雨點傾豆黍逡巡溜河漢指顧纔笑語破屋少  
乾床茅苫固難禦出門泥没足此厄比鄰溥苟令終歲



熟敢有今日怒晚照上東軒清風襲虛廡微生免荷鉏  
但喜脫煩暑農父更事多缺塘已增土

舜泉復發

奕奕清波舊遠城早來泉眼亦塵生連宵暑雨源初接  
發地春雷夜有聲復理溝渠通屈曲重開池沼放澄清  
通衢細灑浮埃淨車馬歸來似晚晴

次韻徐正權謝示閔子廟記及惠紙

西溪秋思日盈牋幕府拘愁學久騫記廟終慚無好句

醉墳猶喜有前篇

生先作祭  
閔子文

屏除筆硯真良計  
寫寄交

遊畏妄傳吳紙贈君君莫恠  
耕耘廢罷有閑田

張文裕侍郎挽詞

持節西南二十年  
華堂遺像已蒼然  
歸來侍從三朝舊  
老去雍容平地仙  
落筆縱橫題壁處  
誦詩清壯舉杯前  
東遊邂逅迎歸旆  
淚落城南下馬阡

東方書生行

東方書生多愚魯  
閉門誦書口生土  
窓中白首抱遺編

自信此書傳父祖辟雍新說從上公冊除僕射酬元功  
太常弟子不知數日夜吟諷如寒蟲四方窺覷不能得  
一卷百金猶復惜康成穎達棄塵灰老聃瞿曇更出入  
舊書句句傳先師中途欲棄還自疑東隣小兒識機會  
半年外舍無不知乘輕策肥正年少齒疎脣腐真堪笑  
是非得失付他年眼前且買先騰蹕

送韓宗弼

大野將凍河水微慨然臨流送將歸登舟上帆手一揮

脫棄朋友如弊衣我來三見芳草腓來時同寮今已非  
念昔相從未嘗違西湖幽遠人事稀青蓮紫芡傾珠璣  
白魚掉尾黃鼈肥客醉將起命闔扉方橋月出風露霏  
星河下照搖清輝喧呼笑語相嘲譏歲月一逝空長歎  
交遊去盡將誰依君家漢代平與韋藹然令德傳餘徽  
鳴鳩著地鴻高飛安得久此同繫轡

送劉長清敏

汝州太守卧病年疊疊猶復能清言平生雄辯嗟不見

風流尚有曹州存歷下東遊少相識歡喜聞君在西邑  
舊知兄弟無凡儔相逢一笑開顏色三年政令如牛毛  
思歸南畝皆蓬蒿羨君飲酒動論斗引觥向口收狂潮  
醉後胸中百無有偃然嘯傲傾朋曹中朝卿士足官府

君歸何處狂謠謠

劉原甫自長安  
病歸余始識之

汝尚將歸吳興齊州記室蘇子由辱詩為送因遂  
韻謝之云

釋屣從軍早濫官已衰能復尚盤桓邇來齒髮羞相問

乞有衡茅覓自安使我襟懷遺內熱誦君詩句襲人寒  
知誰便是知音者且作巖溪雪景看

高祖郎中頃蒙以御史召力辭不允解組而歸  
先生作是詩以送之 高祖溪堂集中亦嘗賡  
和淳熙丁未澂假守筠陽謹刊篇末

樂城集卷五

欽定四庫全書薈要卷一萬五千一

集部

樂城集卷六

宋 蘇轍 撰

詩一百首

題張安道樂全堂

天命無不全人事每自傷譬如摩尼珠宛轉有餘光藻  
飾不能加塵垢豈有亡世人未嘗識姑射手自將我公  
體自然率性非勉強馳驅四十年不入憂患場晚歲事  
蒙養斂退就此堂小儒豈知道宿昔窺門牆申屠師無



人無足亦自忘如逢鄭執政一笑先生傍

和鮮于子駿益昌官舍八詠

桐軒

桐身青琅玕桐葉蒲葵扇落落出軒墀亭亭奉閒燕夜  
聲疎雨滴午影微風轉秋飈一凌亂淅瀝驚蔥蒨朝日  
失繁陰青苔覆遺片空使坐中人慨然嗟物變

竹軒

幽軒離紛華惟有一叢竹纖梢起餘寒紫筍散輕馥擢

翰春雨餘挺節秋霜足不知歲時改守此娟娟綠上有  
吟風蟬空腹未嘗食翦伐非所辭不受塵土辱

栢軒

築室城市間移栢南澗底山林風所尚封植聊自寄崎  
嶇脫巖石擁塞出芬翳上承清露滋下受寒泉惠秋來  
采霜葉咀嚼有餘味苦澁未須嫌愈久甘如薺

巽堂

山前三秦道車馬不遑息日出紅塵生不見青山色峰

巒未嘗改往意自奔迫誰言幽堂居近在使者宅俯聽  
辨江聲却立睨石壁藤蘿自太古松竹列新植暑簟卧  
清風寒樽對佳客試問東行人誰能同此適

### 山齋

平地厭喧囂虛齋上山足蕭條遠城市坡陀富林麓簡  
書日填委杖履每幽獨豈無山中士高卧白茅屋逢人  
默無語長嘯響巖谷此室庶可招夜月相從宿

### 閑燕亭

登山稍已高曠望良亦遠危亭在山腹物景行自變諸  
峰宿露收草木朝陽絢盎盎雲出山溜溜泉垂坂徐行  
得佳處永日遂忘返此樂只自知傍人任嫌懶

會景亭

亭高衆山下勝勢不自收罔巒向眼盡風籟與耳謀  
飛半嶺息雲起當空遊視身如乘風超然忘百憂暮歸  
室中居唯見窻戶幽視聽隨物變恍誰識其由

寶峰亭

昔過益昌城莫登君子堂  
駕言念長道未暇升崇岡  
今聞寶峰上縹緲陵朝陽  
三休引蘿蔓一覽窮蒼茫  
微雲靄雙劒落日明故鄉  
奔馳迹未安山藪意自長  
漂搖萬里外手把新詩章  
宦遊不忘歸何異烏欲翔  
塵土汙顏面年華侵鬢霜  
何時首歸路所至聊徬徨  
樽俎逢故人亭榭凝清光  
為我具斗酒宿恨猶可償

次韻分司南京李誠之待制求酒二首

世上升沉都夢裏  
春來彊健闕樽前  
公田種秫全拋却

坐客無氈誰與錢

春深風雨半相和  
節物令人意緒多  
中酒何須問賢聖  
和詩今尚許羊何

送施厯城辯歸常州

高人不受塵土侵  
三年浙江藏何深  
久閒物理有相復  
厯城官事森成林  
乘時斂散逐十二  
鞭撻逋負徒哀矜  
一杯相屬未嘗得  
百畝歸去將安能  
潛逃雖出知者後  
黽勉尚見仁人心  
歸期忽告三月尾  
強留不顧千黃金

河豚雖過鱸鰖在粳稻正插風雨淫酒肴勞苦罄隣里  
期會迫隘思僚朋山川吳越我所愛扁舟佗日要追尋  
滯留未用便相詫半年歲月行駸駸

施君既去復以事還戲贈

令尹西行去又迴西湖重把舊樽罍吏民再見雞棲乘  
猶道吾公挽不來

和文與可洋州園亭三十詠

湖橋

湖南堂宇深湖北林亭遠不作過湖橋兩處那相見

橫湖

湖裏種荷花湖邊種楊柳何處渡橋人問是人間否

書軒

綠竹覆清渠塵心日日疎使君遺癖在苦要讀文書

冰池

水深冰亦厚滉蕩鋪寒玉好在水中魚何愁池上鷺

竹塢



空陂放修竹蕭蕭復冥冥  
莫除塢外筍從使入園生

荻浦

離披寒露下蕭索微風觸  
摧折有餘青從橫未湏束

蓼嶼

風高蓮欲衰霜重蓼初發  
會使此池中秋芳未嘗歇

望雲樓

雲生如涌泉雲散如翻水  
百變一凭欄悠悠定誰使

天漢臺

臺高天漢近，匹練掛林端。  
秋深霜露重，誰見落西山。

待月臺

夜色何蒼蒼，月明久未上。  
不上倚城臺，無奈東南嶂。

二樂榭

動靜惟所遇，仁智亦偶然。  
誰見二物外，猶有天地全。

灤泉亭

泉來草木滋，泉去池塘滿。  
委曲到庭除，清泠備晨盥。

吏隱亭

隱居亦非難欲少求易遂有意未成歸聊就茅簷試  
霜筠亭

林高日氣薄竹色淨如水寂歷斷人聲時有鳴禽起  
無言亭

處世欲無言事至或未可唯有此亭空燕坐聊從我  
露香亭

重露覆千花繁香凝畦圃不忍日將晞散逐微風去  
涵虛亭

虛亭面疎篁，窈窕衆景聚。更與坐中人行尋，望來處。

溪光亭

溪亭新雨餘，秋色明滉漾。鳥渡夕陽中，魚行白石上。

過溪亭

溪淺復通橋，過者猶恨懶。賴有沙上鷗，常為獨遊伴。

披錦亭

春晚百花齊，縣縣巧如織。細雨洗還明，輕風卷無迹。

禊亭

觴流無定處客醉醒還酌毋令仲御歌空使人驚愕

菡萏軒

開花濁水中抱性一何縈朱檻月明時清香為誰發

茶蘼洞

猗猗翠蔓長藹藹繁香足綺席墮殘英芳樽漬餘馥

篴簫谷

誰言使君貧已用谷量竹盈谷萬萬竿何曾一竿曲

寒蘆港

蘆深可藏人下有扁舟泊正似洞庭風日暮孤帆落

野人廬

野人三四家桑麻足生意試與叩柴荆言辭應有味

此君庵

風梢遶簷匝霜幹當窻淨遙知素壁上醉墨森相映

與可

墨竹冠  
絕今世

金橙逕

葉如石楠堅實比霜栢大穿逕得新苞令公憶鱸膾

南園

官是勸農官種桑亦其所安得陌上人隔葉攀條語

北園

使君美且仁遍地種桃李豈獨放春花行看食秋子

次韻吳興李行中秀才見寄并求醉眠亭詩二首

才堪簿領更無餘贏得十年閒讀書寵辱何須身自試  
窮愁不待酒驅除故人歸去無消息佳句新來屢卷舒

前日使君今在此不妨時復置雙魚

李公擇自吳興移齊南

右和見寄

是非一醉了無餘  
唯有胃中萬卷書  
已把人生比遽傳  
更將江浦作階除  
欲眠賓客從教去  
倒卧鸕鶿豈暇舒  
京洛舊遊真夢裏  
秋風無復憶鱸魚

右醉眠亭

和子瞻玉盤盂二首

東武蘇莒公家園中千葉  
白芍藥子瞻新為此名

千葉團團一尺餘  
揚州絕品舊應無  
賞傳莒國遷鍾虞  
移憶胡僧置鉢盂  
叢底留連傾鑿落  
鉗中捧擁照浮屠



強將絳蠟封紅萼，憔悴無言損玉膚。

故相林亭父老知，出羣草木尚何疑。無多產業殘花藥，  
幾許功名舊鼎彝。豐艷不知人世別，佳名新換使君詩。  
明年會看花尤好，剝盡浮苞養一枝。

寄題密州新作快哉亭二首

車騎崩騰送客來，奔河斷岸首頻回。鑿成戶牖功無幾，  
放出江湖眼一開。景物為公爭自致，登臨約我共追陪。  
自矜新作超然賦，更擬蘭臺誦快哉。

檻前灘水去云云洲渚蒼茫煙柳勻萬里忽驚非故國  
一樽聊復對行人謝安未厭頻攜妓汲黯猶須卧理民  
試問沙囊無處所于今信怯定非真

贈馬正卿秀才

男兒生可憐赤手空腹無一錢死喪三世委平地骨肉  
不得歸黃泉徒行乞丐買墳墓冠幘破敗衣履穿矯然  
未肯妄求取恥以不義藏其先辛勤直使行路泣六親  
不信相尤愆問人何罪窮至此人不敢尤其怨天孝慈

未省鬼神惡兄弟寧有木石頑善人自古有不遇力行  
不廢良謂賢

答文與可以六言詩相示因道濟南事作十首

遠遊既為東魯遷居又愛南山齒髮自知將老心懷且  
欲偷安

舜井溢流陌上歷山近在城頭霸旅三年忘去故園何  
日歸休

野步西湖綠縵晴登北渚煙絲蒲蓮自可供腹魚蟹何

嘗要錢

飲酒方橋夜月釣魚畫舫秋風冉冉荷香不斷悠悠水面無窮

雨過山光欲溜寒來水氣如蒸勝處何須吳越隨方亦有遊朋

揚雄執戟雖久陶令歸田未能眼着雲山無奈神傷簿領相仍

終歲常親鞭扑此生知負詩書欲尋舊學無處時有故

人起予

故人遠在江漢萬里時寄聲音聞道禪心寂寞未廢詩  
人苦吟

佳句近參風雅微詞間發離騷竊欲比君庾信莫年詩  
賦尤高

相思欲見無路滿袂西歸有時及君鈴閣少事飲我松  
醪滿卮

次韻李公擇寄子瞻

青蒲一下復東來，擁扇西風滿面埃。  
擊柝自營何擇地，餽糟同醉未須回。  
孤高振鷺瞻初下，淡泊嬰兒及未孩。  
我亦漂流家萬里，年來羞上望鄉臺。

次韻李公擇以惠泉答章子厚新茶二首

無錫銅瓶手自持，新芽顧渚近相思。  
故人贈答無千里，好事安排巧一時。  
蟹眼煎成聲未老，兔毛傾省色尤宜。  
槍旗攜到齊西境，更試城南金線奇。

金線泉在齊州城南

新詩態度靄春雲，肯把篇章妄與人性。  
似好茶常自養。

交如泉水久彌親睡濃正想羅聲發食飽尤便粥面勻  
底處翰林長外補明年誰送雪溪春

和李公擇赴歷下道中雜詠十二首

泛清河

南北無多水崎嶇未捨船何時好霖雨是處有通川墳  
壠看書卷興亡指道邊蒼茫半秋草猶復較愚賢

將至桃園阻淺且風不得進

卷帆倚棹淺河津憶泛長江步步新未免生涯寄風浪

不堪舟揖委埃塵往來欲就沙囊堰深淺時看舉策頻  
一望雲霓百憂集應思平地隱居人

桃園阻淺將易小舟一夜水大至復乘便風頃  
刻百里

此生與物妄相仇欲往長嫌苦見留淺瀨何知向人惡  
漲溪豈復為公流雨痕忽到工催客風信初來轉打頭  
舉目汀洲都未改忽添清興滿行舟

下邳黃石公廟



地下相逢南北人三邀不勸識天真十年却見穀城下  
寂寞同收一夢身

宿遷項羽廟

尺箠西來壠畝中驅馳力盡衆兵衝舊封獨守君臣義  
故國長修俎豆容平日軍聲同破竹少年心事喜摧鋒  
錦衣眷戀多鄉思肯顧田家社酒醲

呂梁

出沒懸流雖有道憑陵險地本無心未能與物都無礙

咫尺清泉亦自深

梁山泊

次韻

近通沂泗麻鹽熟遠控江淮粳稻秋粗免塵泥汙車脚  
莫嫌菱蔓繞船頭謀夫欲就桑田變客意終便畫舫遊  
愁思錦江千萬里漁簑空向夢中求

時議者將乾此  
泊以種菽麥

梁山泊見荷花憶吳興五絕

次韻

南國家家漾綵艫芙蓉遠近日微明梁山泊裏逢花發  
忽憶吳興十里行

終日舟行花尚多清香無奈着人何更須月出波光淨  
臥聽漁家蕩槳歌

行到平湖意自寬繁花仍得就船看回頭却向吳儂說  
從此遠遊心未闌

花開南北一般紅路過江淮萬里通飛蓋靚粧迎客笑  
鮮魚白酒醉船中

菰蒲出沒風波際鴈鴨飛鳴霧雨中應為高人愛吳越  
故於齊魯作南風

次韻李公擇九日見約以疾不赴

它年逢九日杯酒逐英豪  
漸老經秋病獨醒何處高床  
頭添藥裏坐上減牛毛  
寂寞知誰問煩公置濁醪

喜雪呈李公擇

秋來旱已久雪至亦不薄  
沉沉夜未眠蔌蔌聲初落  
霏微入疎戶眩晃先朱閣  
披衣視羣動照屋始驚愕  
晨起犯清寒繁陰看溟漠  
喬林凍相倚隙瓦乾猶爍  
孤村掩圭竇深逕沒芒屨  
平野恣汗漫四山增煒堦  
晚色漏斜

陽林光粲相錯氛埃一清蕩疫癘解纏縛寒蔬養春芽  
宿麥布冬脚官居亦何賴歲事信所託逋逃幸一飽剽  
盜止羣惡無事樂自多有酒庶可酌我行今不久公到  
時方昨豐穰識天意暇豫可前約齋厨雖無餘賓客甚  
易諾行湏酒壺倒莫待陰雲剝

次韻范郎中仰之詠雪

倉廩未應空長天霰雪濛瓊瑤布地淨組練出師雄雲  
濶諸峰遍花繁百草同農謠麥壠外客興酒杯中聚散

占風力消融驗藥功

歷城西北陽起石  
山其上的不留雪

遠遊聊自喜三

見歲時豐

次韻李公朝著作見贈二首

遠客徒為爾江邊有故丘汀洲信廣大鳬鴈任漂浮好  
事時攜酒歸心久倦遊還鄉定衰老朋友肯相收

其二

稽古終何力扶衰謾有方故人憐困躋佳句贈輝光未  
暇抽身去安能插翅翔空存踈懶性高卧笑羲皇

惠穆呂公挽詞二首

全齊開故國清廟饗元功德業真無忝名但未充邊  
防推信惠社稷倚勤忠不作司徒貴何慙鄭武公

其二

風俗非平昔賢豪棄此時新阡長宿草行路拜豐碑惠  
術遐方記嘉猷信史知悲涼哭墳客不為受恩私

次韻蔣夔寒夜見過

都城廣大漫如天旅人騷屑誰與歡北風號怒屋無瓦

夜氣凝冽冰生槃雪聲旋下白玉片燈花暗結丹砂丸  
叩門剥啄驚客至吹火倉卒憐君寒明時未省有遺棄  
高論自笑終汗漫識君太學嗟歲久至今客舍猶泥蟠  
正如憔悴入籠鶴坐見摧落凌風翰明朝尚肯過吾飲  
有酒不盡行將酸

次韻王鞏廷評招飲

病憶故鄉同越鳥性安田野似裨諶都城歲晚不歸去  
客舍夜寒猶獨吟樽酒憐君偏好客詩篇寄我謬知音



會須雪裏相從飲履迹旋平無處尋

雪中會孫洙舍人飲王氏西堂戲成三絕

新歲逼人無一日殘冬飛雪已三迴百分琥珀從君勸  
十里瓊瑤走馬來

南國高人真巨源華堂邂逅接清樽十年一見都如夢  
莫恠終宵語笑喧

傾盡香醪雪亦晴東齊醉卧已三更佳人不慣生疎客  
不盡清歌宛轉聲

雪中呈范景仁侍郎

羈遊亦何樂幸此賢主人東齋暖且深高眠不知晨開  
門驚照曜舞雪方繽紛繁雲覆庭廡落勢一何勻霏霰  
本無着積疊巧相因萬類忽同色九衢淨無塵園林開  
組練觀闕堆瓊珉蟲書散鳥足縞帶翻車輪遠遊浩千  
里欲出迷四隣誰言助春農亦善欺客貧賴我古君子  
高談吐陽春方當庇華屋豈憂無束薪

次韻景仁丙辰除夜

數舉除夜酒稍消少年豪浮光寄流水妙理付濁醪微  
陽未出土大雪飛鵝毛試問冰霜勁春來能久牢

次韻景仁招宋溫之職方小飲

高人兩無事相見輒傾懷時以酒相命何妨心自齋燈  
期飛雪亂春候苦寒乖不就頽然醉難堪風且霾

次韻景仁飲宋溫之南軒二首

白髮迎新歲皤然國老更感時能細說對酒任徐行畫  
軸高分品詩詞妙入評疎狂先醉倒應許恃鄉情

其二

飲闌餅已罄話久僕須更高會良難得危言豈易行歸  
休便老計得失任臺評猶有青編在它年不世情

次韻景仁正月十二日訪吳鎮寺丞二絕

夜雪滿庭雞失晨瓊田早出不驚塵急須卷凍鋪黃道  
欲看燈山萬萬人

濁醪時飲十分杯萬象冥濛曉氣暄醉倒籃輿夜歸去  
金吾寧復識誰哉

柳子玉郎中挽詞二首

晚歲抽身塵土中，滯山仍乞古仙宮。  
羞將白髮隨馮叟，欲就丹砂繼葛洪。  
龍虎未能留物化，芭蕉久已悟身空。  
騷人欲作招魂賦，蟬蛻疑非世俗同。

新詩錦繡爛成編，醉墨龍蛇灑未乾。  
共首卜居空舊約，宛丘攜手憶餘歡。  
風流可見身如在，鄉國全歸意所安。  
行到都門送君處，長河清淚兩洄瀾。

贈淨因臻長老

十方老僧十年舊燕坐繩床看奔走遠遊新自濟南來  
滿身自覺多塵垢煖湯百斛勸我浴驪山衮衮泉傾竇  
明窓困卧百緣絕此身瑩淨初何有清泉自清身自潔  
塵垢無生亦無滅振衣却起就華堂老僧相對無言說  
南山采菌軟未乾西園擷菜寒方茁與君飽食更何求  
一杯茗粥傾銅葉

次前韻答景仁

儒林談道亦云舊遠自太史牛馬走區區分別竟何為

擾擾祇添心上垢道大如天不可測異出同歸各穿竇  
浩然一水散千漚却觀彼我曾無有我丈中心冰玉潔  
世上浮榮盡灰滅終年行道自不知笑指空門名異說  
此心未信道不生石上下種何由茁道在起居飲食中  
安問胡僧分五葉

遊城西集慶園

送客城西客已遠歸路北池接南苑冰漸片斷水光浮  
柳線和柔風力軟繚牆朱戶誰家園流水平畦春日淺

禁河分溜一池足洛圃移花百金賤飛甍斤斧聲未絕  
翠栢栽培影初遍傍人笑指高臺處前年適見荒榛滿  
金錢力奪天地功歲月未多風物換人生富貴無不成  
都門坐置山林觀暖風遲日時一到早出莫歸應未晚  
主人最貴稀出城長使憧憧路人者

遊景仁東園

新春甫驚蟄草木猶未知高人靜無事頗恠春來遲肩  
輿出東郊輕裘試朝曦百草抱生意喬松解寒姿尺書




招友生冠蓋溢通達人生瞬息間幸此休暇時濁酒淪  
浮蟻嘉蔬薦柔荑春來莫嫌早春去恐莫追公卿多王  
事田野遂我私松筠自擁蔽里巷得遊嬉隣家竝侯伯  
朱門掩芳菲畦花被錦繡庭檜森旌旗華堂絢金碧疊  
觀凝煙霏髣髴象宮禁蕭條遠喧卑徐行日一至何異  
已有之都城閉門早衆客紛將歸垂楊返照下歸騎紅  
塵飛但卜永日歡未與清夜期人散衆囂絕庭光星斗  
垂安眠萬物外高世良在茲





藥城集卷六



總校官庶吉士臣張能照

校對官檢討臣龔大萬

膳錄監生臣賈捷三

膳錄監生臣張子誠